

2 vol. [H. J. ...]

1912  
20



# PARALLELE DES VIPERES

Reçu 31596

& herbes Lyonnoises,

AVEC LES VIPERES  
ROMAINES, ET HERBES  
CANDIOTES.

*Où est prouué la Theriaque, dispensée avec les  
Viperes & herbes Lyonnoises, n'auoir pas  
les vertus, ni les effets de la vraye  
Theriaque, mais plustost d'un  
Diateffaron.*

Sæpe expugnauerunt veritatem à iuuentute,  
etenim non potuerunt ei.



A L Y O N,

De l'Imprimerie de SCIPION IASSERME.

M. DC. XXXII.

AVEC PERMISSION.

THE UNIVERSITY OF CHICAGO

LIBRARY

OF THE

PHYSICS DEPARTMENT

CHICAGO, ILL.


RECEIVED

APR 10 1954

BY

DR. J. R. OGDEN

PHYSICS



PHYSICS DEPARTMENT

CHICAGO, ILL.



A MESSIRE,

MESSIRE

CLAUDE PELOI,

Seigneur de Sandal, & Pont-David, Cheualier, Conseiller du Roy, Tresorier General de France, en la Generalité de Lyon, Preuost des marchands.



*A verité ( Monsieur ) par l'artifice de certains Pseudo-Galenistes & Hermaphrodites du temps, n'ayant peu auoir aucune retraite en la maison de Dieu, ie*

vous la presente, comme suppliante, afin qu'elle trouue dans l'appuy de vostre auētorité son azyle. J'ay taché pour la maintenir, de ietter de sa semence dans les esprits de ceux qui par leur qualité, & par leur merite, pouuoient estre ses protecteurs, & ses hostes. Mais des vns ayant esté le cœur preoccupé, ils sont deuenus pierreux, & le grain n'a peu germer. Autres ont esté enuironnés d'espi- nes, intrigues de ce monde, qui l'ont suffoqué en sa naissance, ou bien les oiseaux du ciel qui sont les complai- sans de ce siecle, sont venus, & l'ayant trouuée respendue & abandonnée sur le chemin, l'ont deuorée, & peu ont esté susceptibles de la retenir & la produire en sa parfaite maturité: & c'est ce qui m'occasionne vous offrir sa defence escrite, pour obliger

S

le vulguaire à recognoistre, sous l'a-  
bri de vostre illustre Nom, que tant  
s'en faut que la Theriaque faite  
avec les Viperes, & herbes de ce païs,  
aye les vertus assignées par Galie, &  
qu'elle soit meilleure que celle qui est  
dispensée avec les Viperes Romain-  
nes, & les herbes Candiotes, qu'au  
contraire elle ne produit non plus  
d'effect qu'un Diatessaron. Vous  
pouvés donc (Monsieur) retrancher  
cet abus, & ne permettre dorese-  
n-avant aucune dispensation de The-  
riague, sinon celle qui sera sans sub-  
stituts; & le peuple, à la conservation  
duquel vous avez pris soin de veil-  
ler, esclancera au ciel les benedictions  
accoustumées de donner par les Is-  
raélites à leurs bienfauteurs, Que  
l'Eternel vous rende vostre œuvre,  
& soit vostre loyer, qu'il vous benie

& vous garde, esleue & face reluire  
 sa face sur vous. Et de la generation  
 que le Tout-puissant vous à donné,  
 vostre Maison soit ornée comme  
 une vigne planteuse de ses pam-  
 pres, & comme un Oliuier fructueux  
 de ses nouveaux surgeons. Qu'on  
 vous aduoüe en la conduite d'une  
 police de Ville, un Moysse; en Zele, un  
 David; en prudence, un Salomon:  
 & qu'on public de vous, quia co-  
 medisti butyrum & mel, sciuiſti  
 reprobare malum, & eligere bo-  
 num, & cependant i'aplaudiray à  
 ces acclamations populaires, faisant  
 vœu de viure le reste de mes iours,

Vostre tres-humble & obeissant  
 seruiteur,

C. PONS D. M.



PARALLELE  
DES VIPERES  
& herbes Lyonnoises, avec  
les Viperes Romaines, & her-  
bes Candiotes.

PRÆFACÉ.

**L'**EXCELLENCE & l'uti-  
lité de la Theriaque, dis-  
pensée selon l'ancienne  
description d'Androma-  
chus, se remarque par ce passage de  
Galien à Pamphilius, chap. 2. où il dit,  
Que si cet Antidote n'auoit que cette  
vertu de guerir & preseruer des mor-  
sures des Serpens, & du poison; veu  
que ces accidens sont rares, elle res-  
semble



sembleroit à quelque précieux meuble qu'on laisseroit consumer de vieillesse, auant que l'occasion se presentast de s'en seruir : mais qu'outre les susdites facultés, elle conserue vne verte vieillesse, vne longue vie, les sens alegres & entiers, vne santé stable, & ne nous deliure pas seulement des maladies presentes, mais nous preserve aussi des futures : & il donne la raison, en ce qu'elle purifie le sang, non pas en euacuant, mais en surmontant par sa vertu la mauuaise qualité d'ice-luy, la rendant amie, d'ennemie qu'elle estoit à nostre vie.

Ce que recognoissans Messieurs les Recteurs de l'Hostel Dieu du Pont du Rhosne de Lyon, desireux de la santé publique, premeditoient de dispenser la Theriaque avec les Viperes Romaines & herbes Candiotes, sans aucuns substitus, conformément à l'ancienne formule laissée par Galien

lien au liure 1. des Antidotes. Mais ce  
genereux deſſein eſt auorté par la bri-  
gue de certains intereſſés , qui apre-  
hendans voir le negoce de leurs Tro-  
chiſques de Viperes , & en ſuite leur  
Theriaque ( qui n'eſt , pour dire laco-  
niquement , qu'un Diateſſaron en ef-  
fect ) au deſcry & au rabais ſi Meſſieurs  
les Recteurs de l'Hoſtel Dieu ſe ſer-  
uoiet d'autres trochiſques que des Vi-  
peres de Lyon , & diſpenſoient vne  
Theriaque avec des medicamens plus  
excellens , que ceux qu'ils emploient  
ordinairement , ont ſi puiffamment  
roidi leurs eſprits, qu'à la fin ils ont ob-  
tenu cet aſcendant ſur la volonté de la  
plus grande partie de ces Meſſieurs,  
que de leur faire croire que la Theria-  
que ſeroit du moins auſſi bonne, ſi elle  
eſtoit compoſée des Viperes & herbes  
Lyonnoïſes , qu'avec les Viperes Ro-  
maines, ou de ſemblable climat , & les  
herbes Candiotes, nonobſtât pluſieurs

remonstrances, & raisons que i'aye sceu alleguer au contraire, lesquelles ayans apperceu, combien que ie les presentasse avec humble affection de la main droite : neantmoins ont esté receües de la gauche avec mespris. Sur quoy les chiens gardiens du Capitole, & depositaires des secrets d'Esculape, n'ont osé abayer (de crainte ie dirois, si mon genie estoit satyrique, de perdre leur curée) l'ay creu que ie deuois du moins, comme Medecin de l'Hostel Dieu, & de la Charité de Lyon, recognoissant le preiudice qui en arriueroit aux pauvres, donner au public ces feuilles, pour faire voir la syncerité de mon intention, & empescher que la verité ne s'eclipse ; laquelle parce qu'elle ne veut pas estre déguisée, les Poëtes l'ayant depeinte tantost nue, tantost simplement habillée, i'vseray d'un discours naïf, & sans fard.

Ce Traité contiendra quatre Paradoxes,

doxes, auxquels ie donne ce nom, parce qu'en iceux ie prouue par auctoritez, & par raisons mon opinion, qui s'est trouuée neantmoins contraire à l'aduís que certains Pseudo-Galenistes donnerent à Messieurs les Recteurs, touchant la difficulté proposée.

Au I. Je preuueray donc que les Viperes Lyonnoises ne sont de la qualité requise selon Galien, pour estre employées à la dispensation de la Theriaque, & qu'au contraire les Viperes Romaines, ou de semblable climat, ont toutes les conditions requises par Galien.

Au II. Je monstrey, que les Trochisques des Viperes faits en l'Hostel Dieu au mois de May passé, encor bien qu'elles eussent eües toutes les marques alleguées au premier Paradoxe, que toutesfois pour n'auoir obserué en faisant les susdits trochisques les conditions demandées par Galien, qu'ils ne

*r. la Thoniqua*

peuvent estre legitimement employez à la confection de la Theriaque.

Au III. Je feray voir les herbes Candiotes estre plus excellentes, que les Lyonnoises.

Au IV. Je concluray que la Theriaque composée des Viperes, & des herbes Lyonnoises, ou avec des autres substitués, comme du vin de Falerne, ou de Candie n'a pas les vertus, ni les effets de la vraye Theriaque, mais plustost d'un Diatesaron, n'ayant aucunes des preuues qu'assigne Galien à la bonne Theriaque, & en suite i'infere ceux là abuser Messieurs les Recteurs de l'Hostel Dieu, qui leur persuadent la Theriaque faite avec les Viperes, & herbes Lyonnoises, estre meilleure, ou du moins aussi bonne, que si elle estoit composée des Viperes Romaines, ou de semblable climat, & des herbes Candiotes.



PARADOXE I.

**G**ALIEN pour faire voir qu'il est  
nécessaire d'auoir des bonnes  
Viperes pour faire la Theriaque excel-  
lente, dit au liure à Pison, chap. 15. qu'v-  
ne des principales causes pourquoy son  
effect est rendu inutile , est le dol & la  
fraude qui se retrouue aux Viperes,  
desquelles considerant l'importan-  
ce en la confection de cet Antidote:  
ie preuueray en ce Paradoxe par plu-  
sieurs raisons, les Viperes Lyonnoises  
n'auoir les qualitez requises, pour estre  
employées en la composition de la  
Theriaque : mais au contraire les  
Viperes Romaines, ou de semblable  
climat, auoir toutes les conditions de-  
mandées par Galien.

La I. raison selon Galien au liure u.  
de la faculté des simples medicamens,

chap. 2. l'aliment augmente ou diminue la vertu de la chair des animaux.

*Mercur.* Ainsi quand nous ordonnons aux phthisiques le lait d'anesse, les praticiens commandent de la nourrir d'orge, cicchorées, laitues, feuilles de Saule, & autres herbes refrigerantes; & les Romains mandoient leurs malades de fièvre hectique en vn lieu proche Naples, appelé Tabias, parce que le lait leur estoit plus fauorable, à cause du pasturage de la contrée; & auant que de tirer le sang d'un bouc, de le nourrir avec du fenouil, sermontain, & autres plantes aperitiues.

*Thap.* A ceste occasion Galien au liure à  
e 20. Pison, dit qu'il ne faut pas prendre les Viperes aussi tost qu'elles sont sorties de leurs tanières: mais les laisser vn peu respirer ce nouveau air, & se nourrir de leurs alimens accoustumés, qui sont tant certaines herbes, que certains animaux, comme les Buprestes, Cantharides

des & Chenilles du Pin, dites Pityocampæ ; & adjoute, que ces animaux sont leur plus propres & idoines alimens. Et en vn autre endroit du liure cité, chap. 15. dit, que l'vne des plus grandes fautes que font les chasseurs de Viperes, est, de ne les pas nourrir de leurs alimens ordinaires, ains de leur donner de la chair à manger.

Donc puis que le Lyonnois, ni les païs circonuoisins, quatre iournées à la ronde, ne produisent peu ou point, ni de Buprestes, ni des Chenilles du Pin, qui sont leurs propres alimens. Je dis, que les Viperes Lyonnoises, (si Viperes on les peut nommer) ne sont de la qualité requise, pour estre employées en la cōfection de la Theriaque, & qu'aux enuiron de Rome ces animaux se trouuans, les Viperes Romaines sont propres pour seruir d'ingrediens à cet antidote.

Que si on nous objecte que les Viperes



peres se nourrissans de Cantharides & Chenilles du Pin, & selon Aristote liure 8. chap. 29. de l'Histoire des animaux, des Scorpions; & selon Baldus Angelus au liure de la nature & faculté des Viperes, chap. 8. des Crapauts, d'Aragnées, d'Escarbots, & autres semblables animaux, elles deuiennent plus veneneuses, selon Aristote cité.

Ie respons, qu'il ne parle que de leurs morsures, & non pas de leurs chairs; car la Cicogne se nourrit de serpens, & mange des Crapaux quand la faim la presse. Selon Conradus Gesnerus liure 3. de l'Histoire des oiseaux; la Caille s'engraisse d'Hellebore, & l'Estourneau, se repaist de Cigue, & du Napellus, dit des François, Chapperon de moines: & toutesfois personne ne dira que la chair de ces oiseaux soit veneneuse, encor bien qu'ils vivent des serpens, d'Hellebore, de Cigue, & de Napellus, qui sont venins à l'homme.

Je respons secondement, que l'alimēt de la Vipere est composé de deux substances; l'une veneneuse, l'autre alimentaire; & qu'elle a ceste propriété de les separer l'une d'auec l'autre, & logger celle qui est veneneuse dans le fiel, auquel il se répād par certains canaux dans deux ou quatre bourses situées à la racine des dens; & de celle qui est alimentaire, s'en nourrit selon Baldus Angelus, liure cité, chap. 30.

Je respons troisiémement avec Courtin, liure 8. des apostemes, chap. 45. que quand la chair des Viperes seroit veneneuse, qu'estant corrigée avec des medicamens aromatiques, qu'elle deuiet alexitere.

La II. raison. Les Viperes selon Galien au liure à Pison, chap. 20. ne sont propres pour la confection de la Theriaque, qu'apres auoir posé leurs despouilles, & il en donne la raison; parce que ce sont reliquats d'une qualité

maligne & rabifique, contractée durant le temps qu'elles ont demeuré en leurs tanieres. Or est-il que les Viperes qui ont esté présentées à Messieurs les Recteurs de l'Hostel Dieu, non plus que celles qu'on employe ordinairement n'ont posé leurs despouilles. Donc elles ne sont pas receuables pour la confection de la Theriaque : mais bien les Romaines, desquelles on ne se sert iamais sans auoir posé leurs despouilles.

Dauantage, si les Viperes, au dire de Galien à Pison, chap. 9. quittent leurs despouilles à la façon des autres serpens, lesquelles selon Aristote liure 8. de l'Hist. des animaux, ch. 17. les posent deux fois l'année : sçauoir, au Printemps lors qu'elles sortent, & en l'Automne; ne pourray ie pas conclurre que les Viperes Lyonnoises ne posent point du tout, ou rarement leurs despouilles, puis que lors qu'on les prend, elles ne  
les

les ont pas encor posé? Et quand se despouilleroient-elles de leur premiere peau, veu qu'elles sont si tardiues à ce faire, qu'il est impossible qu'elles se deuestent d'une seconde en vne mesme année? Et partant ie conclurray, estre differentes de celles dont Galien se seruoit à Rome pour la confection de la Theriaque, qui deuestoient leur peau deux fois l'année.

La III. Plus long temps les Viperes demeurent en leurs tanieres, plus elles sont malignes, selon Galien à Pison, chap. 20. & Syluaticus en donne la raison; parce qu'elles abondent plus en excremens, & demeurans plus longuement à cause du froid dans les lieux sousterrains, leur grand venin ne se peut exhiler. Or est-il que les Viperes Lyonnoises ne sortent si tost que les Romaines: parquoy ie diray, les Viperes Romaines, comme moins veneneuses, estre meilleures; & les Lyon-

noïses, comme participantes de quelque qualité maligne, non receuables. L'intention d'Andromachus ayât esté, au dire de Galien à Pison chap. 8. lors qu'il a meslé quelque venin à la composition de la Theriaque, de choisir vn qui fust mitoyen entre les deux extremes: c'est pourquoy il a choisi les Viperes qui sont mediocrement vénéneuses, leur venin étant plus puissant que celuy des Serpens, & plus foible que celuy du Basilic, ou autre.

La IV. Si selon Galien au liure 1. des Antidotes, chap. 33. le médicament est iugé le meilleur, qui a les qualités qui sont plus propres à son genre, & plus eminentes; Je diray que les Viperes ayant esté demandées par Galien au liure à Pamphilian, chap. 11. & au 1. des Antidotes, chap. 29. grosses & charnues, & que telles se retrouuans à Rome, elles doiuent estre meilleures que celles de Lyon, lesquelles combien qu'el

qu'elles semblent estre charnues ; toutesfois elles sont flestries , molles & remplies de mucosités.

La V. La morsure des animaux veneneux de mesme espeece , rapporte les mesmes accidens: Or est-il, que la morsure des Viperes de Rome , selon Galien , liure II. de la faculté des simples medicamens , chap. 2. cause vne soif si vehemente , que le malade creuera plustost de trop boire , auant que de pouuoir appaiser sa soif ; & cependant les Viperes Lyonnoises ne causent pas cet accident , ainsi qu'on a peu remarquer recemment en la morsure d'un deuot Religieux. Je conclurray estre de diuerse espeece avec les Romaines.

La VI. Aristote au liure 8. de l'Histoire des animaux , chap. 3. recite , que les Viperes se trouuent dans les creux des rochers , & les serpens sous la terre: or est-il , que les Viperes Romaines se trouuent dans les creux des rochers:

mais les Lyonnoises dans les prez , & à la raze campagne des lieux circonuoisins, nommémēt de la Bresse marescaugeuse, au raport mesme des païsans, qui nous les vendent , & tout recemment, comme i'escriuois cecy , en ont fait foy

*Le Dimanche 12. Septembre 1632. le païsant estât de Villars en Bresse.* à Messieurs les Recteurs de l'Hostel Dieu. Donc il est facile à iuger, si ceste qualité manquant aux Lyonnoises, on s'en peut seruir pour la confection de la Theriaque.

Le mesme Aristote au 3. de l'Histoire des animaux, chap. 1. dit, que la Vipere differe du Serpent , en ce que ses œufs ne sont pas amoncelés l'un sur l'autre, comme aux Serpēs , mais arrangés dans le corps l'un apres l'autre , à la façon des grains de chapelets enfilés en vn cordon ; laquelle difference on retrouve bien aux Viperes Romaines, mais on ne l'a pas encor remarqué aux Viperes Lyonnoises.

Finalemēt venons à l'experience  
qui

qui est la vraye pierre de touche, pour discerner le vray d'auec le faux. Galien au liure *de medicinis facile parabilibus*, raconte, que la teste de Vipere escrasée sur sa morsure, la guerit : & au liure de la Theriaque à Pison, chap. 13. dit, que sa chair appliquée en semblable accident, produit le mesme effect : & au liure II. de la faculté des simples medicaments, chap. 2. remarque, les Viperes à cause de leur faculté desiccative, guerir la lepre ; & rapporte l'exemple de deux hommes, qui ayant beu du vin, où vne Vipere estoit suffoquée, ont esté gueris parfaitement de la lepre ; & qu'en suite de ces deux accidens inopinés, il en guerit d'autres, leur ordonnant de manger de la chair des Viperes assaisonnée en façon d'Anguilles. Pline liure 30. dit, qu'Antonius Musa Medecin d'Auguste, guerissoit à Rome avec grande promptitude les vlcères les plus malins, ordonnant l'usage de la chair



chair des Viperes. Or est-il, que les Viperes Lyonnoises, n'ayant pas les propriétés & facultés susdites, comme les Romaines : ie rejetteray donc ces premières, comme ingrediens inutiles à la composition de la Theriaque, puis que l'une des principales intentions pour lesquelles les Viperes ont esté adjoustées, c'a esté pour resister aux morsures des animaux veneneux, comme des Viperes ; estant la Theriaque en ceste action plus excellente, que le Mithridat, selon Galien au commencement du i. liure des Antidotes.

Que si les interessés nous objectent que les Viperes Lyonnoises, ou celles qu'on employe à Lyon dès l'année 1619. ayant esté approuvées par le College de Messieurs les Medecins de Lyon, ne sont plus subjectes à present à la censure.

Ie respons, que cette approbation n'a pas esté faite iuridiquement, ni legitime

gitimement, mais par surprise : car dès la premiere fois qu'on estala des Viperes Lyonnoises en public, Monsieur de la Cloistre Procureur du College, & vn tres-hôme de bien en sa profession, s'opposa à ce qu'elles ne fussent admises pour la cōfection de la Theriaque; & alors on tascha d'obtenir par artifice ce qu'on ne pouuoit par le droit, & par le merite des Viperes : ce qu'il se recognoit par la date du certificat des Medecins soussignés, du 15. Aupil 1619. auquel temps se celebroit la solemnité de Pasques. Or est-il, qu'il est tres-vray, que ce iour pour la reuerence de la Feste, le College ne s'assembla pas : parquoy ie soustien cette approbation estre nulle, & mendiee de porte en porte chez quelques particuliers; les Medecins n'en ayant iamais ensemblement deliberé. Et depuis ce temps la, iusqu'à present, que ie ne peux permettre, ma conscience sauue, qu'on abuse

Messieurs les Recteurs de l'Hostel Dieu. Les intéressés pour le grâd emolument qu'ils retirent iournellement, ont continué la fabrique de leurs trochisques, & en redoublans leur brigade, minuent la ruine de ceux qui publient à haute voix l'vsage de ces denrées nuisibles à la santé humaine. Et toutes ces procédures m'ont fait recognoistre, que ce n'est de maintenant que la prauité du siecle, & les interets particuliers oppugnent la verité. S. Paul la preschoit en Ephese, descriant le culte des Idoles. Aussi tost Demetrius Orfevre, & intéressé en ce qu'il gaignoit beaucoup à vendre des petites statues d'argent de la Deesse Diane, craignant la perte de son gain, cōspire avec ses partisans, cōtre ce saint Personnage. Il ne se faut pas donc s'estonner maintenant si on poursuit avec tant de passion & de violence l'approbation de ces pretendus trochisques, & si on tâche d'obscurcir le Soleil de verité, par le mensonge.



## PARADOXE II.

**I**CY nous monstrerons que les Viperes ayant toutes les qualités cy deuant mentionnées , toutesfois auant que d'en faire des trochisques, & qu'ils soyent propres pour faire la Theriaque, il faut obseruer trois choses.

La I. Ou aussi tost , ou vn peu de temps apres qu'elles ont esté prises, d'en former des trochisques, selon le conseil de Galien à Pamphilian , ch. 9. qui en donne la raison , parce qu'elles deuient en les gardant plus veneneuses ; mettant en auant par exemple l'homme à ieun, duquel la salieue, s'il a tant soit peu ieuné , sera salée, & si le ieune continue plus long temps, amere, & en suite il contractera vne habitude bilieuse , & maligne de tout son corps ; de maniere que selon qu'il aura

D 2

plus,

plus, ou moins ieuné, sa salive fera, ou plus tost, où plus tard mortelle au Scorpion qui en sera touché.

C'est pourquoy Serapion dit tres-bien, que les Viperes estant gardées, elles deuiennent affamées, & comme telles fort bilieuses; & à ceste cause Galien au liure à Pison, chap. 20. determine le nombre des iours, defendant de les garder plus de deux; voire mesme il conseille d'en former des trochisques le mesme iour, s'il est possible.

La II. Les femelles sont preferables aux males, comme ayant leur chair moins veneneuse: car la femelle a quatre dents, à la racine desquelles se trouuent quatre boursfettes, où se loge & arreste leur venin, au lieu que le male qui a beaucoup plus de virus que la femelle, n'en a que deux, & par consequent deux boursfettes, lesquelles ne pouuant le receuoir entierement, il faut de necessité qu'il regorge dans le corps,

corps, & qu'il infecte toute sa substâce.

L'experience aussi nous fait voir le masle estre plus veneneux que la femelle, en ce que les masles causent vn plus grand prurit aux mains de ceux qui les manient, ou les escorchent, que non pas les femelles; ce qui prouient de ce que d'autant plus que leur chair est veneneuse, d'autant plus elle est acre.

Entre les femelles, celles-là sont preferables, qui sont roussastres, pour estre moins véneneuses que les noires, qui leuent hautement la teste, & qui sont plates, & le ventre eminât, car alors elles sont iugées ieunes & vigoureuses; & quand aux Viperes blanches, elles sont, comme ie crois, plus phlegmatiques, & ont moins de vigueur; Galien iugeant du temperament des animaux selon la couleur.

Galien au liure 1. des Antidotes, chap. 19. rejette les Viperes pleines, estât pour lors extenuées, languides, & rem-

plies d'excremens ; car portant iusqu'à vingt Vipereaux, au dire de Syluaticus liure 1. chap. 2. ce grand nombre succe & attire la meilleure partie de leurs sucs pour sa nourriture.

La III. est de Galien à Pison, ch. 20. qui veut apres auoir coupé la teste & la queue aux Viperes, qu'elles ayent ces deux conditions ; l'une, que leur tronçiette suffisammēt de sang ; l'autre, qu'ils soient mobiles : car s'ils apparoiſſoient immobiles, & sans sang, alors comme inutiles, il les rejette.

Il est donc facile à conclurre, que les trochisques de Viperes qui ont esté dispensés en l'Hostel Dieu, au mois de May passé, ne peuuent estre legitime-ment employés à la confection de la Theriaque, n'ayant en les faisant obserué les trois conditions cy deuant dites ; car on les a gardé du moins huit iours ; on n'a pas choisi les masses d'avec les femelles, & entre les femelles, celles

celles qui estoient roussastres, & plattes, qui auoient le ventre eминet, & qui leuoient hautement la teste, on n'a pas aussi reiecté celles qui estoient pleines de Vipereaux; & si apres leur auoir coupé la teste, & la queue, on n'a pas pris celles desquelles le tronc a esté mobile, & qui a beaucoup saigné.



## PARADOXE III.

**E**N ce Paradoxe ie prouueray les herbes de Candie estre meilleures que les Lyonoises, ou d'autres païs.

Premierement par Galien liure 1. des Antidotes, chap. 6. qui dit, que les Emperours entretenoient des Herboristes en Candie, affin non seulement de leur fournir, mais aussi à toute la Ville de Rome, les racines, les herbes, les fruiets, les semences, & les suc qui estoient necessai



cessaires pour la Theriaque, parce que les simples venans de Candie, estoient meilleurs que les autres, & moins subjects d'estre falsifiés.

Secondement, Galien au liure cité, chap. 23. parlant de l'Iris, qu'il appelle Illirique, assure que cette denomination ne luy a pas esté vainement donnée, non plus que le surnom que prennent plusieurs autres medicamens du lieu de leur patrie; & par apres il dit, que le Persil de Macedoine, le Bitume & Baume de Iudée, & ainsi des autres, sont tres-excellens, à cause des singulieres vertus qu'ils empruntent des susdites regions où ils croissent; & en suite

*Chapitre 24.* il prise comme medicamens tres-bons le suc de regalisse, la semence de Napi, le Scordium qu'on apporté de Candie.

*Chapitre 22.* Et en vn autre passage, le Marum, l'Amracum; & en diuers autres endroits, diuerses autres plantes, qui prennent le nom de Cretiques, ou Candiotes, com-

me le Dictamnnum, la semence de Daucus, l'Hypericum, la Centaurée, &c.

Mesué en son 1. Theoreme en donne la raison, en ce que le lieu de la naissance des simples medicamens a pou- uoir de contribuer quelque vertu particuliere en leur substâce. Et pour preu- ue de son dire, il cite Platon, qui escrit, que la nature a départi certaines vertus particulieres à certains lieux qui se cõ- muniquent aux plantes que la terre produit dans son sein; car leur propre estant d'attirer vn aliment conuenable à leur espee: par exemple, la Vigne vn suc doux, le Lupin vne humeur nitreu- se, le Cocombre sauuage vn suc amer, ce que retrouvans en leur lieu natal, & non ailleurs, elles acquierent la perfe- ction des vertus qui est deüe à leur espee; à cette cause l'Authcur cité loüe le Scammonée d'Antioche, & rejette comme le pire, celui de la region des Scenites.

Et pour faire clairement recognoistre qu'une region donne des vertus a quelques simples, qu'une autre contrée luy dénieroit ; i'allegueray Galien au liure *de medicinis facile parabilibus*, ch. 143. qui raconte, le suc de la grande Serpenteaire, ou de la Morelle, auoir cette faculté en la region du Leuant, d'empescher la partie qui en sera frottée de la morsure du Serpent ; & cependât nous voyons le suc de ces deux herbes de ce pais estre destitué de cette vertu : & partant ie conclus ces medicamens estre meilleurs, & plus excellens que les Lyónois, Ceux, dis-je, qu'Andromachus le pere, & Damocrates appellent Candiot, en la description de la Theriaque, faite en vers Elegiaques & Iambiques, ou ceux que Galien faisoit venir de Candie, comme de leur lieu natal, voulans dispenser cet Antidote, par le commandement de l'Empereur Antonin, ainsi qu'il le recite au liure 1. des

Anti

Antidotes, chap. 1. & ie soustiens, en me  
 seruant des paroles de Galien, discou-  
 rant de l'Iris, Que si on compare ces  
 simples de Candie qui entrent dans la  
 Theriaque, avec ceux de Lyon; on  
 trouuera qu'il y a autant de la differen-  
 ce à raison de l'excellence de leur ver-  
 tu, comme d'un corps mort avec celuy  
 qui seroit viuant.

Troisiémement, Galien au liure ci-  
 té, chap. 23. escrit, le Polliot, le Chamæ-  
 drys, apportés de Candie, estre meil-  
 leurs de beaucoup, que ceux qui nais-  
 sent en Italie; parce que le Printemps  
 y est trop humide. Et en suite il dit,  
 que le Chamæpitys, l'Hypericum, la  
 Gentiane, la semence de Thlaspis, &  
 autres qui croissent en quelque cōtrée  
 d'Italie, égale en vertu les plâtes qu'on  
 apporte de Candie, quand la constitu-  
 tion du Printemps est plus seche. l'in-  
 fere donc, que les herbes de ce pais à  
 cette consideration, doiuent estre de

beaucoup moindres. Le climat de Lyon, au Printemps principalement, estant plus humide que celuy de Rome, ou du reste de l'Italie, & ne pouvant en aucune façon égaler en chaleur & sechêresse le terroir Romain, & encor moins celuy de Candie; par consequent ie diray aussi, que les herbes Lyonnoises n'égaleront en vertu celles d'Italie, ni de Candie.

Quatriemement, Galien cité, ch. 6. rapporte ce medicament meilleur qui surpasse en odeur, & au goust: & par apres il adjouste au ch. 23. qu'il est plus gros & mieux nourri que les autres medicamens de mesme espee. Or est-il, que les herbes de Candie surpassent les Lyonnoises, & celles des autres côtrées en odeur, grosseur, & au goust, estant plus odoriferâtes, & plus aromatiques, mieux nourries, & d'un goust plus excellent. Donc les herbes Candiotes sont meilleures que les Lyonnoises, &

asseu

assure qu'en leur place on n'en peut substituer d'autres, sans deteriorer la vertu de la Theriaque.

Et pour faire toucher au doigt comme les herbes de Candie sont plus excellentes que celles de Lyon, c'est que ie mettray par exemple sur le Bureau le Scordium de Crete, qui a cette propriété d'empescher la corruption, selon Galien liure 1. des Antidotes, ch. 24. ou il rapporte, que s'estant donné vne bataille en vne campagne tapisée de Scordium, que les corps morts des Soldats qui tomberent dessus, demeurent long temps sans se corrompre, & principalement celle partie qui les touchoit; & que de cet accident on a tiré cette consequence, qu'il auoit ce pouoir de contrarier aux venins des animaux reptiles, & à toutes sortes de medicamens qui peuuent introduire corruption au corps. Or est-il, que le Scordium de ce pais n'a pas cette fa-

culté, parquoy ie iugeray celuy de Candie meilleur.

Ie pourrois aussi rapporter vn second exemple du Calament, lequel selon Dioscoride liu.3. ch 36. & Galien liu. 7. de la faculté des simples medicamens, ch. 1. a cette propriété de remedier aux morsures des animaux veneneux; parce qu'estant d'une substance subtile, accompagnée d'une forte chaleur, & d'une amertume mediocre, toutesfois tres efficace, il resiste puissamment à la putrefaction; à ceste occasion son suc pris interieurement, ou appliqué exterieurement, tue les vers. Or est-il, que le Calament de ce pais n'a la vertu ni de resister aux morsures des Serpens, ni de tuer les vers: parquoy i'ay iuste subject pour sa foiblesse de le rejeter comme inutile à la confection de la Theriaque, & par consequent tous les autres simples Lyonnois, comme estant plus foibles que ceux de Candie.



# PARADOXE IV.

**A**YANT prouué les Viperes Romaines, & les herbes de Candie, estre meilleures que les Lyonnoises, i'infere donc pour faire vne excellente Theriaque, telle que Messieurs les Recteurs de l'Hostel Dieu auoient proposé de faire : deux principales conditions estre requises; l'vne selon Galien ch. 12. au 1. des Antidotes, qu'elle soit entiere-ment faite des meilleurs medicamens: c'est pourquoy les Viperes Romaines, & les herbes de Candie estant plus excellentes que les Lyonnoises, elles y doiuent estre employées par préférence.

Cette premiere condition est prou-  
uée par deux raisons; l'vne tirée de Ga-  
lien au liure à Pison, chap. 3. disant, que  
pour bien faire la Theriaque, il faut  
observer la proportion des vertus & fa-  
cultés



cultés de ces ingrediens ; à cette occasion il defend de mesler des medicamens puissans avec des foibles, ou d'espece, ou de vicillesse, affin que les puissans ne viennent à preualoir contre les foibles, & en rapporte plusieurs exemples, tant de la Myrrhe, Galbanum, Safran, & autres : mais celuy de l'Opium Thebaïque est tres-remarquable, lequel pour estre excellent en son espece, & meslé avec les autres foibles en vertu, arriua qu'au lieu de faire vne bonne Theriaque, il en resulta vne composition semblable au Philonium, qui est vn medicament somnifere.

Il faut icy remarquer que les interessés en l'observation de cette condition choppent, ayant persuadé à Messieurs les Recteurs se seruir des Viperes & herbes Lyonnoises, qui sont medicamens foibles, meslés avec des autres ingrediens, comme la Myrrhe, le Styrax, Sagapenum, l'Encens masse, le Cinnamon,

mome, la Cassia lignea, les trois sortes de poiure, noir, blanc, & long, qui sont medicamens puissans, pris en leur lieu natal, & qu'ils n'ont aucune analogie avec nostre corps; ainsi que pretendēt lesdits interessés auoir les herbes & Viperes de ce pais; de sorte qu'ils feront, non vne Theriaque, mais vne Opiate, qui aura la faculté du medicament, qui surpassera les autres en vertu.

L'autre raison est aussi de Galien au liure à Pison, chap. 16. où il asseure la Theriaque se corrompre par le vice de l'un de ses ingrediens, & rapporte plusieurs Histoires de diuers medicamens; entre autres du vin, au liure 1. des Antidotes, chap. 8. lequel pour n'auoir esté ni vieil, ni tres-bon, il fut cause que la Theriaque s'enaigrit; laquelle faueur elle peut aussi acquerir quand en la confection des trochisques de Viperes on y adjouste du pain en trop grande quantité, & qui n'est ni bon, ni bien

cuit, ni bien pestri, selon Galien cité, & Maranta liure 1. de sa Theriaque, ch. 29.

Et sur la fin du 9. ch. du liure cité, il defend d'vser de vin de Falerne qui soit trop vieil, parce que estant amer en sa vieillesse, il rend la Theriaque amere.

Finalemēt, au chap. 7. il raconte, qu'une certaine personne pour auoir employé en place du miel d'Athenes, vne autre espeece apporté de Cnido, ou Rhodio, lequel encor bien qu'il eust les marques d'un bon miel, comme celuy qu'on appelloit Thasium, ou Hymettrum: neantmoins parce que deuenant vieil, il prenoit les qualités du vin, il fut causé que la Theriaq; deuint vineuse.

La seconde condition qui est nécessaire de practiquer pour faire vne bonne Theriaque, est enseignée par Galien liu. 1. des Antidotes, chap. 2. qui defend de n'adjouster, ni diminuer aucun de ces ingrediens, & conseille de suivre l'ancienne description, si on veut qu'elle soit

soit aussi bonne que celle qu'il preparoit à Rome, apres la mort du Medecin Demetrius, pour l'Empereur Antonin. Et pour faire voir que la soustraiction d'un seul medicament qu'on estimoit de peu de consequence, destruit la vertu de la Theriaque, il rapporte l'Histoire du susdit Empereur Antonin, lequel parce qu'en usant journellement d'icelle, il estoit par fois surpris d'un profond sommeil ; il rapporta la cause de cet assoupissement au suc de Pauot : à cette occasion il commanda de l'oster de la composition de la Theriaque. Mais voicy le mal qui en arriua, c'est que la chaleur des autres medicamens n'estant plus moderée par le susdit suc, & l'Empereur Antonin estant d'un temperament sec, passoit la plus grande partie de la nuit sans dormir, de maniere qu'il fut contraint de faire re-adjouster le suc de Pauot.

Ces deux conditions manquans,

tant à la Theriaque qu'on pretend dispenser à l'Hostel Dieu, qu'à celle qu'on dispense ordinairement, n'estant faite ni des meilleurs medicamens, & des mieux choisis, adjoustant, diminuant, ou substituant diuerses drogues, les vnes aux autres, selon l'occasion, ou la difficulté presente de les pouuoir recouurer: ie puis avec verité dire, que ce n'est pas vne Theriaque, mais vn Diatesaron en vertu.

Et pour faire voir que les Medecins de Lyon dés longues années n'ont point estimé la Theriaque bonne, estât faite avec quantité de substitus; i'allegueray Mésire Symphorien Campefe Medecin du Duc de Lorraine, & vn des principaux auteurs de l'erection de l'Aumosne generale, lequel à ce subiect dit au liure intitulé, Le Mirouër des Apothicaires, que la Theriaque qui fut dispensée à Lyon, en pleine foire, par René Villateau, & Claude Puissart, sça-

uans

uans Apothicaires ; parce qu'on auoit subrogé plusieurs drogues les vnes aux autres , estoit bien moins mauuaife que celle qui se faisoit ailleurs, comme à Montpelier, Padoüe, Bologne : mais qu'elle n'auoit les vertus & proprietés que donne Galien à celle d'Andromachus.

Ce qui me sera facile à prouuer ; car pour cognoistre si la Theriaque est bõne, & qu'elle n'est ni falsifiée, ni vieille, Galien nous en donne deux marques au liure à Pison, chap. 2. & 23. & à Pamphilian, chap. 4. l'vne, si apres auoir pris vn medicament cathartique, ou vomitif, comme le Scammonée, l'Hellebore, ou autres medicamés violás, elle empesche son operation, en l'exhibant vn peu apres de la grosseur d'vne febue d'Egypte, ou d'vne noisette, elle est iugé tres-bonne. Que si la purgation suit apres la Theriaque prise, on la doit rejeter cõme inutile, & de nulle efficace.

Et nous ne deuons auoir aucun scrupule d'en faire l'experience, soit en vn homme sain, ou malade; car encor bien que l'homme sain, selon Hippocrate, ne supporte qu'avec incommodité la purgation, & qu'en vn homme malade à raison du mutuel combat de la Theriaque, & du medicament, il soit presque impossible que la maladie ne s'augmente: neantmoins, selon Galien, au liure à Pamphilian, ch. 4. si la Theriaque est bonne, elle ne doit non seulement par sa vertu empescher, ni surmonter la force du medicament; mais aussi faire qu'il n'arriue aucune esmotion au corps, ni du sain, ni du malade.

Il faut icy en passant remarquer l'erreur practiqué par quelques vns en ces dernieres pestes, qui mesloient de la Theriaque avec des purgatifs, pensant par ce moyé mieux purger les humeurs infectés de quelques venenosités: car si la Theriaque est bonne & receuable, elle

elle doit empescher l'operation des laxatifs.

Or est-il que cette marque manque à la Theriaque faite des herbes & Viperes de ce pais, ou avec des substitus, ainsi que l'experience nous l'enseigne, à laquelle i'oserois adjouster la raison: car si elle pouuoit empescher l'operation du Cathartique, elle empescheroit aussi la superpurgatiō. Ainsi Galien s'est serui de la Theriaq; au 12. de sa Methode, ch. 7. pour appaiser vne immoderée euacuation d'humeurs qu'auoit procuré le Scammonée en vn ieune homme, lequel fut, dit-il, par ce remede entierement gueri, ce que ne fait pas la Theriaque faite des Viperes & herbes Lyonnoises, ou avec des substitus.

Elle deuroit estre aussi vn souverain remede aux dissenteries, ainsi que publie Galien au liure à Pison, & à Pamphilian; car il est plus facile de contenir & arrester les humeurs esmeues d'elles



d'elles mesmes, que d'empescher qu'elles ne se meyuét, estant agitées & poussées par la force & violēce du médicament purgatif. Et cependant on a veu en cette ville sur l'Automne de l'année 1624. & au siege de la Rochelle sur la fin de l'année 1627. & au commencement de l'année 1628. la dissenterie regner au camp ; en la curation de laquelle la Theriaque faite en France n'a produit aucun effect : de sorte que feu Monsieur Eroüard premier Medecin du Roy , qui en auoit conseillé l'vsage, deslors commença à l'appeller l'happelourde des Antidotes , & louer la prudence des Medecins de Paris , qui n'en ordonnent que tres-rarement, ou du moins en petite quantité, n'excedant la dose de 8. à 10. grains, recognoissans les defauts de la Theriaque faite des Viperes & herbes de ce païs, ou avec des autres substitus.

La secōde marque, pour cognoistre  
la

la bonne Theriaque est, de rendre inutile l'effect du venin, selon Galien liure à Pison, ch. 2. & 25. & à Pamphilian, ch. 4. & alors elle est iugée bonne.

Par le venin, Galien entend deux choses; la morsure des bestes veneneuses, & le poison: quand aux morsures, comme des Serpens, Viperes, Aspics, Chiens enragés, & autres: Galien dit au liure à Pison, chap. 2. qu'il ne s'est iamaïs veû qu'ayant pris de la Theriaque, ou deuant, ou apres la morsure des animaux homicides, que les blessés n'ayent esté heureusement gueris.

Et pour preue de son dire, il dit, que les Preteurs qui auoient pouuoir sur la vie, en faisoient les preuues en la personne des criminels, & luy en des Coqs champestres, lesquels il faisoit mordre par des bestes veneneuses; & apres leur auoir baillé de la Theriaque; s'ils guerissoient de la morsure, il iugeoit la Theriaque bonne.

Et affin que les eloges que luy donne Galien contre le venin ne semblent estre chimeriques, ie ne veux pas alleguer que les Empiriques Italiens sans aucune lesion de leur vie se seruent de cet Antidote: & vn François nommé Des Combes, qui sur vn Theatre, & en presence du peuple en la place Dauphine à Paris, mangeoiët des Crapauts & testos de Serpens: mais ie mettray sur le bureau l'essay qui fut fait l'an 1620. de la Theriaque du sieur Antoine Colin, faite sans substitus, sauf que du Xylobalsamum, laquelle guerit vn Chien mordu d'une Vipere.

Pour la poison, Galien cité louë grãdement la Theriaque, non seulement pour la curation; mais aussi pour la preservation: racontant au liure à Pison, chap. 2. que plusieurs personnes apprehendans à cause de leur mauuaise vie d'estre empoisonnés par leurs ennemis, vsoient de la Theriaque, & au ch. 29. re-

cite,

cite, que Mithridates pour auoir vsé d'un Antidote, qu'on appelle de son nom Mithridat, qui estoit toutesfois moins excellent que la Theriaque, à cause du mélange des Viperes, qui la rend meilleure, il ne peût iamais mourir, quelles violentes poisons qu'il eust pris; combien que toutes ses filles en ayant aualé en moindre quantité, expirassent en sa presence: de maniere qu'il fut contraint de se faire égorger par un sien amy nommé Bystocus, ou selon quelques autres, par un soldat nommé Vitigis, de crainte qu'il ne tombast en la puissance des Romains.

Et au 1. des Antidotes, ch. 2. il repete presque la mesme chose, & adjouste, qu'Aurelien Antonin Empereur Romain, pour n'estre empoisonné, se rendoit la Theriaque si familiere, que d'en prendre tous les iours la grosseur d'une febue d'Egypte.

Aëtius propose un autre moyen de

l'esprouuer contre le venin, & qui semble estre plus facile, en donnant à vn Coq, ou autre animal de semblable grosseur le poids de deux dragmes d'Opium dissoutes en eau, & par apres luy exhiber de la Theriaque de la grosseur d'vne noisette, que si l'animal ne meurt, la Theriaque est iugée tres-bonne, & s'il meurt, inutile à l'vsage humain.

Iean de S. Amand sur le Commentaire de Nicolas Preuost l'esprouue, faisant vne incision en vn fromage, dans laquelle il y mettoit de l'arsenic, & apres de la Thariaque; que si elle estoit bonne, l'arsenic fuyoit, & la Theriaque suiuoit, de sorte que le fromage deuenoit tout noir.

Falco en ces Commétaires sur Guidon l'esprouuoit aussi, en l'appliquant sur vn charbon pestilentiel: car si elle se desechoit aussi tost, il la iugeoit bonne, que si elle restoit en sa consistance  
ordi

ordinaire d'electuaire mol , il la rejettoit , comme falsifiée. Mais parce que i'estime que ni de S.Amand , ni Falco, n'ont iamais employé que de la Theriaque bastarde , ie ne fais pas beaucoup d'estat de leur espreuue; ains m'arrestant à celles que donne Galien , ie dis , puis que la Theriaque faite des Viperes & herbes de ce pais , n'a pas le pouuoir ni de resister aux morsures des bestes veneneuses , ni au poison , ni à l'Opium ; qu'elle n'est pas vne Theriaque douëe des proprietés que luy donne Galien, mais vn Diateslaron, pour la foiblesse de ses effects.

Galien semble tacitement donner vne troisiéme marque, pour recognoistre sa perfection , qui est de guerir & preseruer de peste ; car au liure à Pamphilian , il raconte auoir appris d'Ælianus Meccius tres-excellent Medecin, que la peste regnant en Italie, les habitants ayant vsé de la Theriaque , tous

les autres remedes n'ayant de rien serui, la plus grande partie des malades furent gueris, & tous les sains preserues.

Et au liure à Pison, ch.38.dit,n'auoir essayé aucun plus souuerain remede pour la curation de la peste, que la Theriaque; & il en rapporte la raison, veu que tout ainsi comme par le commandemēt d'Hippocrate, pour chasser la peste qui venoit d'Ethiopie en Grece,on alluma par les rues,& par les places des feux, desquels la matiere estoit non seulement de simple bois, mais aussi de fleurs,bouquets, & autres choses aromatiques, affin de purifier l'air; de mesme la Theriaque, qui est comme vn feu purifiant l'infection de l'air, que nous sommes necessités d'inspirer, empesche l'alteration de nostre temperament, fortifie nos corps, affin de surmonter la malignité de la peste.

Je pourrois encor en faueur de cette  
premiere

premiere raison rapporter vne seconde, tirée de Galien liure 1. de la difference des fièvres, ch. 4. où il dit, que la peste naissant d'une insigne putrefaction, demande vne insigne exsiccation; à cette occasion le même Autheur raconte liure 10. de la faculté des simples medicamens, ch. 15. que la peste regnant en Syrie, plusieurs s'en garentirent, en beuvant de leurs vrines, laquelle est exsiccative, absterfue, & par cette vertu resout & aneantit la putrefaction. Or est-il que la Theriaque est grandement exsiccative, selon Galien, liure 8. de sa methode, ch. 7. d'où vient qu'au 4. liure des lieux affectés, chap. 8. il l'ordonne pour desécher les vlceres purulens & rongeurs les poulmons. Donc la Theriaque preserve & guerit de peste, & dissipe la putrefaction, puis qu'au liure à Pison, son usage nous sert comme d'une cuirasse pour empêcher la corruption que pourroit introduire  
dans



dans nos corps la boisson des eaux malignes, & corrompues.

Or est-il que la Theriaque faite des Viperes & herbes Lyonnoises, ou d'autres substitus, n'a pas le pouuoir de preseruer & guerir de peste : & outre l'experience qui nous a fait voir depuis l'année 1628. iusques à present son impuissance contre cette maladie : i'en r'apporteray la raison, disant que les Antidotes , ou autres compositions sont plus ou moins excellens , selon les diuers degres de l'excellence & bonté de leurs ingrediens ; de maniere que les medicamens substitués estant plus foibles que les medicamens primitifs , & les Viperes & herbes de ce pais moins excellentes que celles de Candie, pour n'auoir principalement la vertu de guerir de la morsure des bestes veneneuses : il ne se faut pas esbayr si la Theriaque faite d'icelles , est si foible , que de ne pouuoir guerir la peste,

puis

puis que le mal le plus difficile & le plus dangereux, selon Galien à Pison, ch.7. est la morsure des bestes veneneuses qui nous surprennent & mordent inopinément, & nous tuent presque aussi tost qu'elles nous ont blessé, ainsi qu'il se peut remarquer par le stratagemme dont vſa jadis vn Carthaginois pour obtenir la victoire contre les Romains, ayant fait jetter dans leurs vaisseaux quantité de pots remplis d'animaux veneneux, qui les faisoient presque en mesme temps mourir qu'il les auoient blessés : mais contre la peste on peut vſer de quelque precaution, & on a aussi le temps d'esprouuer quelques remedes.

C'est pourquoy ie peus bien avec verité conclure, que la Theriaque faite avec les Viperes & herbes Lyonnoises ou autres substitus, puis qu'elle n'a la vertu d'empescher l'operation de la purgation, ni du poison, ni de la peste,

ni de guerir la morsure des bestes veneneuses ; n'est en effect qu'un Diatesfaron , & que les interessés abusent Messieurs les Recteurs, leur voulâs persuader qu'elle est plus excellente, ou du moins aussi bonne , que si elle estoit composée avec les Viperes Romaines, & les herbes Candiotes.

De plus Galien, ainsi que nous auôs cotté cy dessus , veut que la chasse des Viperes se face en temps conuenable, & qu'elles ne soient gardées plus haut de deux iours, pour les raisons susdites. Or outre que nos Viperes ne sont pas telles qu'il marque , à sçauoir prises en des rochers , & lieux secs , ni nourries comme il faut, ainsi que j'ay monstré auparauant ; j'ay vne preuue toute recente & euidente, que nos interessés ne font encores point de consideration au temps de la chasse des Viperes , ni combien elles sont gardées: car vn païsan de Villars en Bressè apporta plu-

sieurs

sieurs douzaines de Viperes à l'Hostel Dieu le Sabmedi 18. de Septembre 1632. lesquelles apres auoir esté renuoyées du commandement de Messieurs les Recteurs, il assëura que les interçsés en achetoient tout autant qu'il en pouuoit prendre , sans faire considération au temps de la chasse, ni combien elles estoient gardées. Je dis donc que la Theriaque composée de ces Viperes, & debitée au public, outre qu'elle n'a point la vertu , ni les operations sus mentionnées d'une vraye Theriaque, qu'elle corrompt nos humeurs & nos esprits , plustost que les espurer ; où au plus ne peut estre qu'un Diatessaron.

Or le Diatessaron est mis au nombre des electuaires amers par Mesué, son inuenteur, ainsi dit, par ce qu'il est composé de quatre medicamens en égale portion : sçauoir des bayes de Laurier, Myrrhe, Sarrafine, & Gentiane ; & on luy attribue quelque legere

vertu contre les indispositions froides du cerueau , & contre le venin & morsure du Scorpion ; d'où vient qu'abusivement on le nomme Theriaque : car tous ses effets sont si foibles au respect de la Theriaque d'Andromachus , que Syluius sur Mesué blasme les Charlatans , & Empyriques qui la vendent aux ames simples pour la bonne Theriaque. Dauantage il veut qu'elle soit plus propre pour les maladies des Mulets & Cheuaux ; d'où vient aussi que le vulgaire l'appelle la Theriaque des mareschaux.

*re.* Que si ce premier essay est agreable au public , j'espere dans peu de temps faire voir au iour la methode d'vser de la Theriaque , afin de se conseruer en santé , & guerir avec facilité beaucoup de maladies facheuses , douloureuses , & rebelles aux remedes.

Cependant ie prieray le Lecteur de lire mes raisons d'un œil sain , & ne les  
pas

pas censurer, sans les auoir attentiuement examiné, afin que ie n'aye subiect comme Machetas, condamné in iustement, d'appeller de Philippe à Philippe quand il sera sans passion. Que s'il desire les contrarier, ie le supplie que son discours soit exempt d'ineectiues, veu que ie ne seray point sans repartie en vne cause si iuste, & interessée pour la gloire de Dieu, & le bien du public.

*Domine libera animam meam à labijs iniquis,  
& à lingua dolosa. De vultu tuo iudicium  
meum prodeat. Psalm. 119. & 16.*

**Laus Deo Virginique Matri.**

---

JE consens pour le Roy que le Liure intitulé, *Parallele des Viperes & herbes Lyonnoises*, &c. soit imprimé par Scipion lasserme, avec defences en tel cas requises.



I. PROST.

---

Permis d'imprimer suivant les conclusions de Monsieur le Procureur du Roy. Fait ce 27. Septembre 1632.

MOIROVD.